

國學基
本叢書 鮑 埼 亭 集

六

書叢本基學國

集亭埼鮚

(六)

撰望祖全

行發館書印務商

鮚埼亭集外編卷三十六

鄞全祖望紹衣

論一

春秋五霸失實論

春秋之五霸其說不一或曰齊桓晉文秦穆宋襄楚莊也或則進吳闔廬而退宋襄或又登越句踐而去秦穆愚皆不以爲然秦穆原非中國之霸曾是西戎之牛耳而可以言主盟者雖史記嘗有天子錫命之文而不足信宋襄實嘗主盟以困於楚故不終先儒亦嘗言之顧不知楚莊之不足言霸也楚莊於中國求如宋襄之一敵且不可得何以言霸蓋楚自成穆以來無日不爭霸而終不得霸直至盟宋會虢弭兵以後始得專會於申而其霸以成然以靈之無道終不可言霸故追屬之楚莊楚莊非霸惟馬騮嘗見及之至吳則黃池主盟方遂其霸而國隨以亡是亦宋襄之流也越雖嘗主盟然從之者寥寥詎能夸糾合之盛乎蓋所謂霸者必能使天下望國皆來聽命定其朝聘之節張其征討之威號令分明有如葵邱如踐土而後不媿於禮樂征伐之自出如楚如吳如越草竊苟簡不過爲霸之間而已卽軼秦宋何足以嗣桓文然則五霸之目究以誰當之曰齊一而晉四也終晉之霸由文襄至昭頃凡十君然實止四世文公垂老而得國急於求霸既有成矣而圍鄭之役見欺於秦此其所深恨也幸襄公眞肖子足以繼霸自靈以後而始衰成公以邲之敗幾失霸至景公而復振至厲公而又衰中興於悼其規模赫然有先公風平公

以後至昭頃則無譏矣。故文也。襄也。景也。悼也。接齊桓而五晉之失霸。齊景稍有志焉。而弗能也。是以霸於此而絕。世之無識者以爲一晉而得五霸之四。疑於予晉過厚。不知論四王者周之文武居二非厚周也。楚之恃強而好勝。莫如靈。其時南北既成。而申之會。要必請於晉而行。是以知天下之望惟晉是說也。今戶部侍郎臨川李公最以爲然。

春秋四國強弱論

鄭桓公當周之季。已能卜齊晉秦楚四國之大。其後卒如其言。吾以四國形勢論之。晉與秦最上。楚次之。齊爲下。自夏以前。皆都晉。蓋其據太行。負中山。扼蒲津。風氣最完固。輔以代北之馬猗氏之鹽。有不殆者三焉。晉之初封。疆宇尙隘。其後漸廓。直與雍豫相接。姜戎又附之。故天下莫強焉。而由太原下瞰長安。纔數百里。故嘗足以凌秦。然秦人據函谷。負三巴。扼渭曲。稱爲陸海。其險不下於晉。是二國者實天下之奧區。楚之勢萬不足以擬此。然而伊洛以南。江漢環之。亦天塹也。進則由申息以通中原。退則閉方城而守。雖強國弗能驟加。亦足豪矣。而齊皆無之。雖負泰山。環濁河清濟。據臨淄。而不足以稱地險。其以東秦稱之者妄也。是以自桓公卒。晉強則附晉。楚強則附楚。而見摧於晉者爲尤甚。靡笄敗後。再折於平陰。三困於夷儀。無不長驅得志。齊之報晉者一特乘其變盈之難。不可爲武。直至晉陽大亂。齊始稍挺。可以知其弱矣。宋之盟。晉楚共議。釋齊秦。齊終朝楚。而秦不然。甚矣。齊之弱也。晉楚相爭。晉之大得志於楚者。城濮也。鄢陵也。楚之大得志於晉者。邲也。楚之敗。以子玉子反晉之敗。以先穀。苟非然者。莫能相尙。然亦皆去其國而歸。若直入其境。則未聞其能大勝者。則險可知也。齊則使人入其堂奥而凌之矣。秦之強足以抗

晉而過楚乃不得稱霸於中原則屈於晉也。晉之霸也首得秦而伐鄭之役失之向非襄公之再勝則晉幾不霸然雖勝之而秦遂去而之楚晉霸之減色也未嘗不以秦故成公厲公之際累欲收秦而不得而楚雖得秦不過稱與國未嘗能致其朝享豈若齊之朝晉朝楚奉命不暇哉夫晉楚雖世霸而菁華亦稍竭矣故五霸之降爲七雄而秦晚出莫能與爭是亦運會之迭爲消長也晉不分或尙足以抗秦晉分而秦盛矣則秦之不成霸也亦未必非福雖然此亦第以險論之耳齊於四國爲稍弱而桓公之時南服楚西致秦葵邱之會晉亦聞風而至何其雄也內政廢兵車衰至使晉人脅之欲令南東其畝則亦視乎其人而已矣。

秦穆公論

甚矣夫讀秦誓者之疏也謂穆公是誓以其悔過之誠故錄之充是心也霸而幾近於王嗟乎穆公而果悔乎哉秦晉之隙始於伐鄭秦與晉共伐之而秦背晉而戍之其曲在秦然晉受大恩於秦而以此爲讐則曲在晉秦旣戍鄭而又襲之則曲在秦然秦自襲鄭而晉邀之則曲在晉是固皆衰世之事不足深責而吾觀當日晉甚巧而秦甚拙彭衙之役孟明欲雪隻輪不返之恥而不意再敗至使晉人嗤爲拜賜悔過者如是乎旣而晉人取汪以報之孟明不能禦復窮兵以逞至於焚舟悔過者如是乎晉人以爲是必死之兵也何必與角角之而勝無所加於前而相尋且不可已不勝或損吾軍於是閉關不出聽其小有所得可以自蓋而秦人果封殲尸而還不知者竟以爲晉之屈豈知晉者乎究之王官之役秦何嘗大有加於晉不久而晉報之矣再敗而一勝已不爲武而况其不成勝也旣食其悔過之言又不足遂其雪恥

之志吾竊爲笑之且夫孟明庸人耳其與陽處父相語甫離俘馘遽以拜賜爲詞何其淺也當其爲斯語而識者有以卜其彭衙之辱矣故吾以爲孟明歸秦之後百里奚蹇叔殆不久死而後得以窮兵不然是二人者必將復痛哭而諫之而不至如此之悖也抑或秦誓之文蓋卽出於二人代作之詞及二人者死而侈心又動亦未可知也左氏之見不及此盛稱秦君臣而以爲霸西戎之舉卽由於此多見其誣也然則聖人之錄之尙書何也曰是非有取而錄之也聖人蓋歎誓誥之衰有如秦人之托諸空言而卒不克踐者故存之以爲世戒不見夫詩之錄闕宮耶僖公有何攘楚復許之功而妄言之聖人之存之亦以示譏非取之也秦自王官之後不復東征蓋亦力竭不能復出矣是舉也後世有學之而亡者慕容垂是也更有謬悠之說以爲聖人逆知秦之繼周而存其誓則是比於緯候之流其亦不待吾言而後辨也夫

楚莊王論

慈溪黃氏曰諸家多以討賊譽楚愚謂楚初令陳人無動將有討於少西氏已乃入陳而縣之是以盜賊之行給而取之也討賊者如是乎徵舒弑君公孫寧儀行父致君之弑以法則徵舒之罪重以情則二人之罪尤重今殺徵舒納二人討賊者如是乎善乎清江張氏之言云二人必誘楚以利故楚殺徵舒而縣陳徵申叔時言陳亡矣又曰徵舒之弑在宣十一年之夏辰陵之盟弑已及年何以不討楚自背盟而行無道故陳亦背楚而從晉黃氏之言可謂核矣愚初治春秋時蓋嘗見及此顧未敢遽反先儒百口同聲之說不知黃氏已言之也然黃氏於楚所以背盟之故尙未發焉春秋之世嗣君得列於會則不討是雖衰世之法要亦霸主之例然也寧儀之奔楚久矣而辰陵之盟帖然則未嘗聽其言蓋楚但欲得陳而已

無他心也。使陳終服於楚，則少西固在所不討。然而陳卽以是年朝於晉，斯楚之所以怒也。於是假討賊之名以加陳，可以使陳無動，固絕非寧儀之力也。其後之復陳也，亦不盡以納諫。蓋是時陳侯固在晉也，倘晉挾陳侯以與楚爭，則事亦尙未可知。於是假納諫之名以復陳，而陳必不敢抗我而他之矣。故謂其討賊者固非卽謂其納諫者亦未盡也。楚之與晉爭者，陳鄭宋耳。辰陵之盟，陳鄭俱在，未幾俱入於晉，故陳平而加鄭矣。鄭亦有賊耶？鄭平而及宋之蕭矣。宋亦有賊耶？是固不待辨而明者。聖經但書辰陵之盟於前，則其後無不了然甚矣。夫左氏之昧也，又何況於諸家。至於靈公之葬，說者以爲前此竟未嘗葬，至是楚始葬之。雖黃氏亦云然，則益昧矣。靈公雖弑嗣國者，固其子也。謂其見脅於逆臣而不備禮，如齊莊公之葬，則固有之。豈竟有棄而不葬者？是特楚人假仗義之名爲之改葬，而徧告於諸侯耳。五霸之中，惟楚最無可稱。僅此入陳之役，諸家許之，而豈知其皆非聖人之意也。

叔仲惠伯論

荀息之傳奚齊也。阿君命而踐危機，故左氏以白圭之玷惜之。而春秋之書法居然與孔父仇牧同科，蓋以王法言之，是易樹子也。以荀息言之，則君命也。彼菀枯之歌出而里克以畏死改節矣，則荀息能誓死不可謂非義。叔仲惠伯更非荀息比也。彼其所傳者爲世子，先君卒既已主喪矣，襄仲突出而弑之，此在未事之先。文公未嘗有並嫡之失也。宣公未聞有奪宗之嫌也。彼其私事襄仲之醜，文公不知，何況惠伯。則是惠伯之死，足與烈日爭光而聖人不書焉，何歟？求其說而不得，遂有妄誕爲匹夫之諒者，或指爲暴虎馮河之勇者，前則馬驥，後則顧絳，一口同詞，有是哉？其謬也，果爾，則將使魯之臣皆如季孫行父、叔孫

得臣奔走以成襄仲之事者反得以通權自任歟。得臣無足論矣。行父號稱賢者方且屈於襄仲而爲之役。則是中流一壺僅惠伯耳。爲此說者徒以長後人臨難苟免之習者也。當付託之重亦有不死以成事者。季友是也是必諒其才力足以辦之而後可不然不如死之愈也。亦有成事而卒害義者。里克是也是以亂濟亂不如死之愈也。安得以惠伯爲徒死哉。倘責惠伯以不能先事弭奸保其所託則亦求備之論要之其一死不可非也。且夫惠伯之死也其孥已奔蔡矣已而復叔仲氏豈非宣公自媿其篡襄仲亦自媿其逆行父輩亦自媿其依違而魯人亦共憐其忠而復之乎柰何百世而後反有持謬論以非之者哉。然則聖人之不具於史何歟。曰春秋旣諱國惡不書子赤之死則惠伯之死無從附見此屈於尊者不得已也亦非以舊史畏襄仲不書而仍之也。

論華元劫盟事

七雄之時勇夫以氣矜互相尙習俗旣成王侯亦降心焉然成功者要僅見其一則蘭相如其一則毛遂至於安陵之唐雎則頗疑附會矣。要其源起於華元之劫盟然左氏所載夜登子反之牀其辭氣仍雍容但終之以子反懼與之盟而已曰懼則華元之情狀足以脅之可見矣此左氏之文詞所以大雅難及也。柰何妄撰曹沫事而史公從而實之妄矣。

孔子正名論

蘇右丞謂靈公之死衛人立公子郢而郢不可乃立輒使輒知禮必辭辭而不獲必逃輒逃郢立則名正矣雖以拒蒯瞶可也雖然孔子爲政豈將廢輒而立郢耶其亦將教輒避位而納父耳蒯瞶得罪於父然

於其入也。春秋以世子稱之。非世子而以世子名。以其子得立。成其爲世子也。若輒避位納父。是世子爲君也。而名亦正矣。其後胡侍郎謂孔子爲政必當告於天子方伯。命公子郢而立之。

子全子曰。右丞何以知蒯瞶之非世子。若本非世子。而孔子可以世子稱之。則本爲世子。而亦可不以世子目之。宋儒說春秋多如此。乃大亂之道也。孔子以世子稱蒯瞶。則其嘗爲靈公所立無疑矣。觀左傳累稱爲太子。固有明文矣。不特此也。其出亡之後。靈公雖怒。而未嘗廢之也。又無疑矣。觀左傳。靈公欲立公子郢。而郢辭。則靈公有廢之意。而不果。又有明文矣。世豈有其子得嗣爲諸侯。而其父遂不必有所受而稱爲世子之禮。右丞之說。真無稽之談也。惟蒯瞶嘗爲靈公所立。未嘗爲靈公所廢。特以得罪而出亡。則聞喪而奔赴。衛人所不可拒也。蒯瞶之歸有名。而衛人之拒無名也。然而衛人方自以爲有名。則以蒯瞶得罪於父也。夫蒯瞶欲殺南子。其處人倫之間。未盡其道。則有之。而其心則可原也。雖以此得罪於父。而當在末減之條者也。況靈公前此嘗立之。而其後又未嘗聲其罪而廢之。則衛人欲追探靈公之意而廢之。於義有未安也。故蒯瞶之歸有名。而衛人之拒無名也。況諸侯之子得罪於父。而仍歸者。亦不一矣。晉之亂也。夷吾奔屈。重耳奔蒲。及奚齊卓子之死。夷吾兄弟相繼而歸。不聞以得罪而晉人拒之也。然則於蒯瞶何尤焉。故孔子之正名也。但正其世子之名而已。旣爲世子。則衛人所不可拒也。且使蒯瞶不得爲世子。則衛人何所見而立。輒其立輒也。固以其爲世子所出。而立之也。天下有世子而不應嗣位者乎。侍郎之說。亦未爲斟酌盡善之道。孔子爲政。必不出於此也。

萇弘論

左傳。萇弘合諸侯以城成周。衛彪傒曰。萇弘其不沒乎。周語有之曰。天之所廢。不可支也。左氏之爲此言。以爲周人殺萇弘之張本也。子全子曰。有是哉。左氏之妄也。左氏喜言前知。故於萇弘之死。亦豫爲之地步。而不自知其背。使如其言。則是後世人臣當國事將去。必當袖手旁觀。方有合於明哲保身之旨。而天地之崩裂。且將不顧矣。雖然。吾於萇弘。則尙別有責焉。春秋之末。所稱閥覽博物君子者。莫弘若也。故孔子亦嘗從之學樂。則其識古今事變必多。據左氏言。周劉氏。晉范氏。世爲昏姻。朝歌之難。周人與范氏及趙鞅以爲討。遂殺弘以說。夫范中行構難之由。不過欲并趙氏。范中行之據朝歌。趙氏之據晉陽。其罪惟均。然至於戰不克。而伐公宮。旣出奔而連齊衛。結戎蠻以傾故國。則其狼狽潰決。無君甚矣。萇弘方將扶周室於垂盡。射狸首以致諸侯之不庭者。則欲使天子得有其諸侯。卽當使諸侯之得有其大夫。今不能明大義於天下。而反從而助焉。天下其謂之何。稽之往事。孫林父之叛衛也。而晉人戍之。是晉霸中衰之時。欒盈之叛晉也。而齊人救之。是齊靈公極亂之時。魚石之叛宋也。而楚人戍之。是楚霸中衰之時。是皆其國無賢臣遠慮。故倒行而逆施。一至於此。是以欒盈之亂。叔孫穆子救晉。次於雍榆。春秋予之。彼與國尚有然者。況天下之共主哉。況敬王之入周也。崎嶇伊洛之間。其惶而得免者。惟晉是依。乃當晉之有事。而忽連衡其叛臣。則其召侮也。固宜。然吾意萇弘之賢。必無此事。或者周室諸臣忌弘之才。方見用於劉氏。及晉之討。無可委過。從而害焉。如唐之殺杜讓能。以說于岐。固始之流涕致諫。而不從者也。古今冤抑之事。容有相類。彼其勃鬱煩沴之氣。莫可暴白。所以血三年而化爲碧。不然。則其爲周計。固未當。一死亦不足辭矣。惜乎左氏生於定哀之際。乃不能爲詳攷其實也。若據韓非子。則以爲叔向所陷。其時叔向之

卒久矣。韓子之言不知何所據也。狸首之射太史公嘗笑之。故予不復述。而但就其致死一節論之云。

亡吳論

春秋之季。吳國天下莫強焉。及其亡也。忽諸。世之尤之者。以爲會稽之成一也。艾陵之師二也。黃池之會三也。向微是者。吳當遂霸天下。然此皆自事之已形者言之。而非其元氣之所由削。福命之所由傾。夫吳之亡。始於通晉。成於入楚。而其構怨於越。則由此兩事而起。固不待其子之身有嚭同之佞員。聖之誅。而識者方知之也。且吳建國於江淮之間。其疆隅不足當楚之半。以形勢言。則大江之與長淮。楚皆踞其上。流江東四戰之地。不足與之爭衡。是以自壽夢以前。俯首而附楚者。非特其風會未開。抑且勢不得不然。晉霸旣衰。思出奇策以制楚。巫臣又藉手以洩私忿。其通吳於晉者。非能確然謂吳之必可以制楚。以爲卽令不果勝。而楚之一歲七奔。命已大病矣。夫吳之一往而無厭也。其亦何所止。竟得志於楚。則必并加於晉。其後齊盟爭長之事可驗也。然晉自趙文子當國。而後偷安視息。以自延特利。其目前之爲助。而不暇遠慮於吳之卽楚也。而楚亦不幸而適在中替之日。當國如子重子反子瑕之徒。皆庸材。是以吳得起而乘之。齊桓之謀楚也。蓋亦嘗用徐矣。輔之以江黃道柏。而不克也。當時之徐。未必下於吳也。前後之楚不同也。然以累世強大之楚。植根已固。卽令不競。豈能猝亡其國。而諸蠻視吳素屬等夷。其中必有倔強而不相下者。斯越禍之所生也。楚不可猝亡。又生與國之患。則吳之國危。吳之國危。其勢固非中原救援所能及。是則輕其社稷之計。而受人發縱指示之愚。以結歎於鞭長不及之地。失策未有如是之甚者。且兵者凶器。聖人不得已而用之。故黷武者造物之所忌也。吳自諸樊以至王僚。無不好戰。疆場之間。連年

角鬪江淮而東前此所未有也玉帛外竭干戈近証民力幾何而不困也強水師爲車戰違地利也凡若此者皆吳人墮於巫臣之計而不自知且吳亦第見平王暮年信用囊瓦費無極鄖將師幾於尸居餘氣以爲可亡之會不知大臣自左司馬戌而下猶有人焉又三公子皆賢者君子是以知楚之未易翦也隨人陳人守舊盟而不寒豈果忘平日見凌之怨覬國者其審矣故當是時非以王者之師臨之必不足以亡楚夫王者之師何如當囊瓦臨陣之際宣其脅畱列侯殺害忠臣之罪正告於楚之三軍以及其近郊遠郊之民則楚人自瓦解而倒戈繼遣一介上告天子及中原諸國宣其累世憑陵諸夏之罪或許以其侵地或許以繼絕九縣之封盡還其故則小國向風牛酒日至爲伯州犁伍奢郤宛發喪收諸亂臣之族付諸理官慰安楚之公室安堵無恐禮其士之賢者則楚人將反爲吾用於是分兵歸吳以備不虞休士於楚以鎮新國則秦人必不敢出而數年之後入朝周室一匡天下大業可得而成矣七國之時樂毅入齊蓋頗有其風焉而惜乎其用未竟也今觀於吳則反是逞其封豕長蛇之習恣其倒行逆施之狀決漳水以灌紀南決赤湖以灌郢則民其魚矣夫槩王與子山爭處令尹之宮則草野之遭汚辱又可知矣楚人上之則痛心於廟社之荼毒下之則切齒於家室之播蕩卽無秦人吳亦安得有楚卒之內變起外援至踉蹌而去所得不償所失夫得失之不相償猶之可也而過此以往楚人之讎雖百世不解豈不懼哉不於其身必於其子孫固罔或不亡矣況自晉人以吳困楚而楚人卽以越窺吳昭公五年越大夫常壽過始以師會楚伐吳圍陽之役越遣大夫胥犴勞之公子倉歸乘舟師而從之其固相結也如此三十一年吳始用師於越而是役也越遂乘虛入吳夫吳旣素有不快於越而入郢之時全不爲備是亦可以

見其疏矣卒之構李之役反隕其身以致貽患於其子其後句踐興師申包胥實在焉則楚自遷都而還雖不以一矢修怨於吳而吳實亡於楚也嗟夫天道好還故禍機之倚伏如轉轂焉可不懼哉或曰若吳當會稽之時不許句踐之成豈能復爲後患而跨三江五湖之固亦不遽至於亡予曰不然吳不滅越固亡卽滅越亦亡夫闔閭父子皆好勝而不顧其後者使其晏然而有越則將以爲天下皆莫吾若其進而與中原爭衡不待其事之畢也是時中原遽衰固不能摧吳之鋒然而商魯之溝荼墨之壘逞其雄心虐民以用楚人復仇之師將起而議其後百粵宗支之處甌閩者從中應之此其亡亦不出二十年以後也或曰然則如之何而可曰夫差之報仇是固不可以已者也旣取越而有之慄慄危懼撫諸小國結好中原其庶可以免乎雖然吳以崛起之國窮兵以犯鬼神之怒求其保泰而持盈也吾有以知其不能故曰吳之亡自壽夢以後啓之至闔閭而極夫差乃天之所假手者耳

越句踐論

以吳之強也而句踐於覆亡之餘生聚教訓而沼之是荆楚所弗能古今之論復讎者孰有光於斯自是而反諸侯之侵地遂以稱長於上國誠偉矣然其晚年功業稍衰何也曰是可以見持盈之難也范蠡之言曰句踐之爲人可與患難不可與安樂以是知其量亦易荒也彼夫差之初政蓋刻苦自勵矣卒以報越及其功成何一往而不克自持也句踐雖不至如此之甚然以沼吳之後夷考其所爲非前日比太宰嚭者亡吳之巨子也句踐信而任之其欲納魯哀公而不克出於嚭之受賂句踐尙可爲國乎吾觀范蠡之去也殆有見於嚭之見用而飄然而避之也文種之死也必嚭惡而殺之也洩庸以下諸公之不復見

也必皆爲嚭所抑也。太史公謂誅嚭者謬矣。爲國莫大乎用人。卽此一端其餘皆可知也。鄧艾平蜀而赦黃皓君子知其不終況從而用之乎。迹其遠鶩上國於魯於衛於邾逞其雄心而淮泗之間終弗能有。是皆亡吳之遺而勾踐襲之其幸而不亡者幾希。嗟乎晉之衰也南方之霸凡三出楚雖久爭中國然至靈王始得專主諸侯之盟。恣睢暴戾遂以自殞繼楚者吳其橫行更甚焉故其亡也愈慘越則稍戢故無覆滅之禍而其不克終霸要亦侈心爲之也。或以爲種不死蠡不去夾輔霸業必不至於此而已。予以爲種不死蠡不去當輔之以廓大其國而必不教以圖霸蠡遠處三江五湖之間鞭雖長而不及欲博主盟之空名而耗其國以從之智者所不爲也。況重之以戮功臣信壬人則其衰也固宜。

信陵君論

信陵君之賢至使漢高祖易代慕之良亦難矣。其初破秦軍以存趙也得之侯嬴其再破秦軍也得之毛公薛公皆知人之效也。顧獨失之虞卿子全子曰是舉也當魏齊之亡走於趙而已失之不待虞卿之至也。魏齊魏之相也又魏之諸公子也夫以諸公子之親加以相之重而使秦人一言而竟惴惴乎不能保其頭卽謂齊之庸有以招強國之侮而以二千里之魏信陵之才不能保其公子與相之頭則辱甚矣。魯仲連之語辛垣衍也曰吾將使秦王烹醢梁王衍驚其言仲連引紂之烹九侯鄂侯以證之吾以爲仲連之證猶疏也何不曰前者魏未帝秦秦猶能取魏公子及相之頭夫公子王之骨肉也相王之左右手也同爲王而不能庇其骨肉與手旣帝之而何難烹醢其身乎吾不知是時衍將何辭以對也且諦觀秦之肆暴於六國也固挾其堅甲利兵以摧人亦半挾其虛聲恫疑恐喝以下人六國之濡也堅甲利兵尙未

至而已爲其虛聲所劫此其所以亡也彼和氏之璧其不重於公子與相之頭明矣。蘭相如以身當之而秦遂不能有加於趙其氣足以抗之也。秦以其氣加人人亦以其氣抗之而秦遂詘然而沮以是知秦之亦無能爲也。何也以氣遇氣有勇者勝此七國時之風習然也且相如之抗秦也以匹夫入虎口而抗之若信陵是時則據吾國而抗之不似相如之危也計不出此使魏齊走趙平原仗義畱之及平原被給見畱於秦虞卿復以魏齊來歸而信陵猶遲疑不敢納焉不可以爲丈夫矣。予嘗爲信陵計是時莫若畱魏齊令無他往而治兵待於境上以書答秦曰魏齊下國之公子而寡君之相也無忌亦忝公子之末而與聞寡君之國政者也范雎則王之相也秦王爲其相他國之王孰不爲其相今王以己之相而求寡君之相卽魏齊不足惜寡君之相足惜下國之公子亦足惜寡君不堪其辱王必欲齊請以師見吾知秦必不敢再索魏齊亦不敢戰至若平原之素行其他不如信陵而是舉則在信陵之上夫平原之與魏齊越境之交耳其始之畱之也尙不足爲平原異及其被給見畱於秦而侃侃曰貴而爲友者爲賤也富而爲交者爲貧也魏齊者勝友也在固不出也今又不在此其言有相如之風矣是時秦雖不肯出平原於關然其氣已屈使趙王能用虞卿之言必不捕魏齊而使廉頗趙奢李牧之徒以兵叩關問罪於秦曰魏齊魏之公子而又相也平原君寡君之弟而又相也范雎則王之相也秦王爲其相他國之王孰不爲其相今王以己之相而摯寡君之相以求魏相寡君不堪其辱王必不出平原君於關願以師見吾知秦必不敢害平原亦不敢戰然則是舉也信陵能行之魏可以自強趙能成平原之美而行之趙可以自強而惜乎其皆不能以遂秦之暴以示六國之弱以是知六國

之必亡也。嗟乎。他人不能。則亦無足責耳矣。信陵君之賢。而亦不能。是可惜也。非特交臂失一虞卿而已也。宋之困於金也。函韓侂胄之首以予之。執田俊邁以予之。其人良不足惜。不知國體之辱。士氣之自此而不振也。

鮚埼亭集外編卷三十七

鄞全祖望紹衣

論二

諸葛孔明入蜀論

眉山蘇氏曰孔明棄荊州而入蜀吾知其無能爲子全子曰謬哉蘇氏之言也荊州之爲江左重也誰不知之雖然由西北以取東南則荊州爲要得荊州而江南不可保由東南以取西北則荊州非其地也當是時曹氏據中原之形勝十有其九由荊州以取襄陽不過得宛洛其地四戰卽得之江南亦不能以兵守之倘謂由荊州以窺武關據長安則甚難桓溫之攻符氏是也蜀之爲土也嵯峨天險宜不過自守之區而爲長安之背高祖嘗用之以取三秦以長安之固豈蜀之所能爭而長安有事則蜀之力能爲患昭烈之入蜀長安十部甫歸曹氏張魯未亡正關中可取之機也其時欲制曹氏當以蜀中窺長安爲正兵而遊軍從荊州以綴宛洛故周瑜爲孫權畫策急以取劉璋并張魯結馬超爲上甘寧亦主其議而孫權謂使曹氏得蜀荊州必危英雄之所見審矣不然孫氏方捷於荆何不徑由江陵北向而顧爲此迂圖哉其後孫氏不能得蜀故終吳之世不能得志於魏況孔明曷嘗棄荆也荊州本非劉氏之有而江左君臣亦無推心劉氏之誠呂蒙之徒日相窺伺夫人又從中主之古無借人之地足以成王業者此孔明得蜀之後所以不欲裁抑法正也吾則謂孔明之失正在不能棄荆以起孫氏之釁而蜀遂以之不振何也孔